

Tungkol Saan Ang Modyul Na Ito?

Sinasabi na ang pinakaugat ng patuloy na paghihirap ng ating bansa, lalong-lalo na sa malaking bahagi ng Mindanao ay ang di pagkakasundo-sundo ng mga mamamayan bunga ng di maayos na relasyon na umiiral sa pagitan ng mga Muslim at Kristiyano. Sa katunayan, patuloy ang hidwaan at sigalot sa pagitan ng mga Muslim at Kristiyano sa iba't ibang lugar ng Mindanao. Maiuugnay na ang maling relasyon na ito ay nag-ugat sa maling pananaw at pag-unawa sa iba't ibang kultura at paniniwala na ginagalawan ng bawat isa, kung kaya, nananatiling isang panaginip hanggang ngayon ang tunay na kapayapaan at kaunlaran sa bahaging ito ng ating bansa.

Bilang isang responsableng mamamayan, ikaw ba ay nababahala sa pangyayaring ito? Nais mo bang makatulong sa pagsasaayos ng relasyong Muslim at Kristiyano bilang isang responsableng mamamayan? Kung oo, para sa iyo ang modyul na ito. Binibigyang diin nito ang mga alternatibong paraan na maaaring magamit upang mapanatili ang magandang relasyon ng iba't ibang pangkat ng tao sa ating bansa, lalong-lalo na sa Mindanao.

Matatalakay sa modyul na ito ang papel ng kabataan sa pagsusulong ng kapayapaan na maghahatid ng bagong sibol ng pag-aaral sa usaping ito.

Nahahati sa tatlong aralin ang modyul na ito:

Aralin 1 - Ang Kaguluhan sa Sitio Pundakit

Aralin 2 - “Interfaith Dialogue”

Aralin 3 - Peace Volunteers : Mga Sugo ng Kapayapaan.

Ano-ano ang matututuhan mo sa modyul na ito?

Matapos mong pag-aralan ang modyul na ito, makakaya mo nang gawin ang sumusunod:

- nasasabi ang kaugalian o kultura ng Muslim at Kristiyano
- naipaliliwanag ang ibig sabihin ng Interfaith Dialogue at Peace Volunteers at
- natutukoy ang mga hakbang na makatutulong sa paglutas ng suliraning pangkapayapaan at pagpapanatili ng tamang pakikipagkapwa-tao sa pagitan ng mga taong magkakaiba ang relihiyon

Ano-ano na ang alam mo?

Bago mo simulan ang pag-aaral ng modyul na ito, sagutan ang sumusunod na tanong upang mabatid mo kung ano-ano na ang nalalaman mo tungkol sa paksang ito.

1. Salita ng Muslim na ang ibig sabihin ay ipinagbabawal sa batas ng Islam.
 - a) halal
 - b) haddis
 - c) hariraya
 - d) haram

2. Pagsasanay ng kabataang Katoliko sa mga wika ng Diyos at doktrina ng Katolisismo.
 - a) katekismo
 - b) misa
 - c) apostolohiya
 - d) liturhiya

3. Mga gawain na itinuturing na sagrado ng mga Katoliko tulad ng pagbibinyag, pagkakasal, pagpapari, at iba pa.
- a) penitensiya
 - b) debosyon
 - c) pagrorosaryo
 - d) sakramento
4. Pag-uusap at pagpupulong ng mga pinuno ng simbahan at ibang relihiyon upang lutasin ang isang suliranin.
- a) peace talk
 - b) interfaith dialogue
 - c) peace rally
 - d) conference
5. Tawag sa namumuno sa gawaing panrelihiyon ng Islam.
- a) Pastor
 - b) Pari
 - c) obispo
 - d) Imam

6. Tawag sa paraan ng pagbibigay-pasalamat sa mga biyayang natanggap ng mga Muslim.
- | | |
|-----------|-----------|
| a) duwa'a | c) assar |
| b) jamaa | d) magrib |
7. Tawag sa mga taong aktibong nakikilahok sa pagsulong ng usaping pangkapayapaan. Ito ay karaniwang binubuo ng mga kabataang boluntaryong nagbibigay ng kanilang mga serbisyo.
- | | |
|----------------------|---------------------|
| a) peace negotiators | c) peace volunteers |
| b) peace party | d) peace talkers |
8. Relihiyon ng mga Muslim.
- | | |
|----------|----------|
| a) imam | c) Islam |
| b) hadji | d) ulama |
9. Tawag sa mga katutubong tribo na naninirahan sa pulo ng Mindanao bago pa dumating ang Kristiyanismo at Islam.
- | | |
|----------|------------|
| a) lumad | c) dumagat |
| b) moro | d) anito |

B) Basahin ang sumusunod na talata at ibigay ang tamang impormasyong hinihingi.

Dahil sa kaguluhang nangyari sa Sitio Pundakit, nagpasya ang mga pinuno nang simbahan na magsagawa ng pagpupulong upang pag-usapan at lutasin ang nasabing pangyayari. Ito ay gaganapin sa Barangay Hall sa nasabing sitio sa Setyembre 15, 2011.

Ano : _____

Saan : _____

Kailan : _____

Sino : _____

C) Buuin ang pagkasulat ng sumusunod na daglat:

1) Tawag sa mga nahalal na pulitiko.

Halimbawa: **Hon.** Honorable

2) Tawag sa mga madre maliban sa Madre Superyora.

Sr. _____

3) Tawag sa kalalakihang Muslim na nakapag-Hadj.

Hdj. _____

D) Basahin ang talata. Salungguhitan ang lahat ng mga pangngalang pantangi.

Si Hadji Omar Suhud ay isa sa mga pinunong Muslim na aktibong nagsusulong ng kapayapaan sa kanilang baranggay sa Pamukalen. Katulong niya ang kanyang kaibigang Kristiyano na si G. Nestor Rosales na kasapi ng Couples for Christ. Kabilang sa kanilang mga ginagawa ay ang pagtatatag ng mga “Interfaith Dialogue” at “Peace Rally” at pagsasanay ng mga “Peace Volunteers”.

E) Sagutin ang sumusunod na suliranin :

- 1) Nagsimula ang pagsasalita ni Fr. Jessie Enriquez sa pagsasanay ng mga “Peace Volunteers” ng 9:25 am, natapos naman ito ng 9:45 am. Ilang minuto lahat ang itinagal ng kanyang pagsasalita?
- 2) Umabot sa 341 ang kabuuang populasyon sa Sitio Pali. Kung 97 katao ang sangkot sa karahasan, ilang tao ang walang kinalaman sa gulong nangyari?

F) Batay sa talaan sa ibaba, sagutin ang sumusunod na tanong:

Araw	Bilang ng Taong Nagpatala Bilang Kasapi ng Peace Volunteers sa Loob ng Isang Linggo
Lunes	11
Martes	16
Miyerkules	29
Huwebes	35
Biyernes	17
Sabado	84
Linggo	56
Kabuuan	248

1. Anong araw ang pinakamaraming nagpalista?
2. Anong mga araw ang halos magkasindami ang nagpalista?
3. Ilan lahat ang gustong makatulong sa pagsusulong ng kapayapaan sa Baranggay Nicogon?

Tingnan sa pahina 56-57 ang sagot.

Tungkol saan ang modyul na ito?

Ikaw ba ay apektado at nababahala sa karahasang nagaganap sa pagitan ng Muslim at Kristiyano sa inyong lugar? Nais mo bang maging bahagi ng solusyon sa suliraning ito? Ang modyul na ito ay naglalaman ng mga kaalaman at karanasan na maaari mong kapulutan ng aral at magamit sa iyong hangaring makatulong sa pagsulong ng kapayapaan sa inyong lugar.

Ano-ano ang matututuhan mo sa modyul na ito?

Pagkatapos mong pag-aralan ang modyul na ito, makakaya mo nang gawin ang sumusunod:

- nasasabi ang tamang impormasyon batay sa isang ulat
- nasasabi ang ilang mga kaugalian ng Muslim, Kristiyano at Lumad
- natutukoy ang tamang hakbang upang makatulong sa paglutas ng problemang pangkapayapaan sa inyong lugar at
- nakababasa ng tamang oras